





Early European Books. Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 17-93/a





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.93/a



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.93/a



Early European Books. Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CINAGL 1.7.93/a

Book x
I
HENRICI MEIBOMII

DE
ILLI VSTRIS
HEIMBURGICÆ
GENTIS

ORIGINE ET PROGRESSV

Epistola

ad

PERILLUSTREM ET EXCELLENTISSIMUM
DOMINUM


DN. FRIDERICVM
ab HEIMBURG

SEREN. BRVNSV. ET LYNEB. DVCIS
SVPREMVM STATVS CONSILIARIVM
ET CVRIARVM PRÆSIDEM
DOMINVM IN GOLTERN.

❧(o)❧

HELMESTADI,

Typis GEORG-WOLFGANGI HAMMI Acad. Typogr.
Anno M DC LXXXIII.





PERILLUSTRIS
DOMINE

Henrici IV. Imperatoris Historia tota,
& eventuum varietate, & miris rerum cir-
cumvolutionibus, hinc Cæsaris infantia &
mala educatione, educatorumque vafis ar-
tibus, inde Principum conjurationibus, & Pontificis Ro-
mani impotente ambitione, omnia sursum deorsumque
volventibus, tam est memorabilis, ut proponi in exem-
plum, & à rerum civilium studiosis accuratè expendi me-
reatur. Bellum tamen, quod Imperator ille cum Saxoniae
Principibus, libertatis suæ tenacissimis, diu gessit, pecu-
liaribusetiam de causis, iis, qui in Saxonia vivunt, diligen-
tius considerandum est, cum non tantum inde, quis Rei-
publicæ status, quæ Cæsaris auctoritas, quæ Principum
conditio fuerit, pateat, sed plurima quoque passim oc-
currant horum locorum memorabilia, bello quippe in hac
vicinia

vicina nostra gesto, ibique Arcibus illis & Castellis extructis, quæ vel æternum jugum Saxonibus imponerent, vel diruta & disiecta, in ipsis ruderibus suis vindicias libertati datas seræ posteritati ostenderent.

Cum igitur nuper in Historia Germanicorum Cæsarum publicè enarranda ad Henrici IV. tempora me detulisset ordo, pleniori discursu bellum illud Saxonicum illustravi, jucundaque contemplatione in vicinæ nostræ antiquitates digressus, simul exposui, quomodo Imperatores Goslaræ sedem suam habere, & inde libertati Saxonum imminere cæperint, extructis per totum illum Hartzicorum montium tractum pluribus validissimis Castellis, quorum vel sola hodie nomina, vel tristia & squallida rudera supersunt. Hic tum memorandæ mihi fuerunt Arces & Castella varia, *Hartzburgum* imprimis, *Wigantenstein*, *Sassenstein*, *Asenberg*, & *Heimenburg* quoque. Monui igitur, ab illo castello *Heimenburg* illustrem Gentem Vestram, ab Henrici IV. ævo Saxoniæ jam cognitam, sui nominis originem arcessere, ibi Majores sedem suam habuisse, & in omni hac vicinia Cæsarum Principumque beneficio multas terras & prædia sibi acquisivisse, donec tandem alibi domicilium figerent. Illa vero occasione, privatis deinde studiis ea evolvi & recolui, quæ de Gente Vestra cum mihi ex antiquis monumentis alias excerpta & seposita, tum ab avo meo, Henrico Meibomio, Historico Guelphico, ante plures annos consignata, *Dn. Aschwino ab Heimbürg* missa fuerunt, ceu ille in Chronico suo Marienthalensi testatur. Non enim nuper demum in clientela *Heimbürgiorum* esse cæperunt Meibomii, sed integrum pene Seculum est, ex quo in Gente Vestra rectorum studio- rum maximi Patroni extiterunt, & nobis quoque eximie faverunt. *Aschwinum ab Heimbürg* (sive Ascanium Romana voce dicere velis) quem, familiariter sibi notum, Johan-

3
 Johannes Caselius noster, litteris incertum an probitate
 magis æstimandus, *gravem virum, prudentem & integrum,*
ingenuarum omnium disciplinarum amantem, sed potissimum
historiæ, universæ quidem, patriæ tamen cumprimis, appel-
 lat, eundem Avus meus dignitate, genere, & doctrina nobi-
 lissimum vocat, *sibiq; ac studiis suis* (Historicis) *ex animo fa-*
viffe scribit, in libello de Irminfula Saxonica, notatq; quod
 cum summi templi apud Hildesienfes esset Canonicus, ibi
 inter Patriarum Antiquitatum sollicitam curam primi
 Saxonum Idoli Irminfulæ effigiem, ignoratam aliquot se-
 culis, situq; & rubigine squalentem, interpolari innova-
 riq; curaverit. Idem Avus meus meminit ibi Cognati
 Vestri *Theodorici ab Heimbürg*, Canonici Cathedralis Ec-
 clesiæ Mindenensis & Archidiaconi Remensis, & similiter vo-
 cat genere & virtute nobilissimum virum. Sed ad *Aschwini-*
um redeo, Patruum Tuum magnum, Perillustris Domi-
 ne. Ille, Patriarum licet Antiquitatum curiosissimus
 non minus ruspator, quàm peritissimus Judex, fami-
 liarumq; etiam nobilium indagator, & propriæ non
 incuriosus, fatetur tamen in Epistola, anno seculi hu-
 jus secundo data, se de primis Familiæ suæ conditori-
 bus non nisi patrias quasdam traditiones habere. Quæ
 igitur Avus meus ex antiquis tabulis, diplomatis & litteris
 eruta cum Illo communicavit, gratissima habuit, & plu-
 secula sibi cognita dein adjecit, ut integram celeberrimæ
 gentis seriem posterius haberent. Quæ vero ego postea
 observavi non pauca ex similibus monumentis, ea cum
 modo dictis collata, & in ordinem digesta, & commentario
 quasi quodam Historico illustrata publici juris nunc facio,
 cum, ut exteris quoque pateat, in Saxonia nostra Nobi-
 lissimas Familias à pluribus seculis incorruptum decus ha-
 buisse, & ad posteros transmississe: tum, ut meam erga
 Illustram Domum *Heimburgicam*, & Te imprimis, Excel-
 lentis-

lentissime Domine, observantiam declararem. Hoc enim in singulari felicitatis meae parte deputo, quod, simulac ego in haec loca, Patrias Avitasque sedes, quasi postliminio nepos redii, & fortunam aliquam sperare capere, à Te statim, quem maximus virtutum & ingeniorum censor, Serenissimus Dux AUGUSTUS, inter praecipua Principatus sui instrumenta ac decora tum asciverat, studiis meis polliceri patrocinium potuerim. At ex eo tempore, viginti amplius annos, uti fortunam indies majorem non tam invenisti, quam meritis Tuis Tibi fecisti, ita crevit erga optima studia, erga hanc inclytam Academiam, erga me quoque favor, ut quo plus posses, plus etiam velles. Dicendum est Academiae Juliae nomine, quoniam ejus quoque pars aliqua sum, tantum illam debere Tibi, quantum cuiquam primariorum Ministrorum, amatam semper à Te, tanquam nutricem etiam quondam, sublevatam in necessitatibus suis, & nunquam non commendatam Serenissimis Dominis nostris. Est interdum ea publici fati conditio, ut studiorum debita non habeatur ratio, oborto erga ea quodam quasi frigore: saepe etiam non desunt, qui contemnant ea, & in exilium agere cupiant, & quovis modo cum suis cultoribus deprimant: ut tanto magis gratulari possimus nobis, quoties à lateribus Principum sedent, qui studiis, ut coluerunt ipsi, ita justum pretium ponunt, & ne tam utilissima parte Respublica deficiat, prudentia sua cavent, cultorumque commodis prospiciunt. Qualem quidem Te semper, Perillustis Domine, plurimis, certisque tot annorum documentis novimus, & experti sumus, quotiescunque res Academiae ordinandae, ejusque vel salus in universum promovenda, vel docentium desideriis prospiciendum fuit; recentissimam adhuc eorum, quae ante biennium in salutem nostram acta sunt, memoria, quae apud peritos quos-

quosque & gratos erit sempiterna. In tanta igitur me-
ritorum Tuorum, erga Patriam, erga Academiam, &
optima studia, abundantia, per plurimos honoris gra-
dus ad Ministerii Ducalis primum & summum delatus,
non ægrè feres, si in Natalium Tuorum dignitatem cli-
ens Tuus inquirat, & omnibus ostendat, præter ea, quæ
Principibus, quæque meritis Tuis debes, aliud quoque ve-
nerabile te habere, Natales scilicet, à plusquàm sexcentis
annis illustres, eâque familiâ ortum, quæ dignitate, vir-
tute, fortitudine, prudentia, pacis bellicque gloria eminuit,
nec minus per fæminas illustrissimis aliquando, illustri-
bus & nobilissimis affinitatibus floruit. Simul vero id
quoque pateat legentibus, quamvis in tanto numero, tot
seculorum decursu, extiterint in Familia Vestra eximia de-
cora & ornamenta, tamen Te eminentissimis quibusque
palmam non tam dubiam facere, quàm præcipere, ut,
in nobili gente nobilissimus, plus illi splendoris adjecisse,
quam ab ea accepisse videaris.

Verum, ut ad historiam ipsam accedam, Castello-
rum in Hartzicis montibus extructorum ante tempora
Henricorum Cæsarum mentionem multam fieri, non in-
venio. Ex quo autem Henricus III. & Henricus IV.
Goslariam diligere, ibique sæpius commorari cæperunt,
plura eorum & potiora construi cæpta, verosimile est,
quamvis exactam primæ illorum originis memoriam non
habeamus. *Lambertus Schafnaburgensis*, Henrico IV. Imp.
coævus, & rerum illius temporis diligentissimus & judicio-
sissimus scriptor, enumerat Castella ab Henrico IV. post
mortem Patris extructa, *Hartespurg*, *Wigantenstein*, *Mose-
berg*, *Sassenstein*, *Spatenberg*, *Heimenburg*, *Asenberg*, *Vo-
kenroth*. Dubites tamen, an illa tum primum extructa,
an verò tantum restituta & amplificata. Solent enim Scri-
ptores isti in determinandis originibus urbium castello-
rumque

rumque id sæpe confundere, & amplificatores pro ipsis conditoribus agnoscere. Vokenroth jam ante Palatini Comitis fuisse, eique ab Henrico quadam legum violentia ereptum, imposito præsidio, ipse *Lambertus* narrat. Et de *Hartzburgo* non minus dubitare licet. Quamvis enim natales ejusdem in tempora Christi nativitatem antecedentia collocare cum quibusdam nolim, neque ea, quæ de Carolo M. destructore hujus loci, & deastri Crodonis in eo, ut postea non Saturniburgum, sed Hartzburgum vocatum fuerit, idoneis auctoribus probentur: *Tidericus* tamen *Lange in Saxonia sua* à Conrado Cæsare (circa initia scilicet seculi X.) constructum Hartsburg memorat, & ibidem quoque Ecclesiam Christo & Valerio ab eo dictam. Fortassis igitur de reædificatione & munitione tantum sunt intelligenda, quæ de condito Hartzburgo per Henricum IV. memorant modo laudatus *Lambertus Schafnaburgensis* & *Marianus Scotus ad An. 1075*.

De *Heimbargo* nihil ante Henrici IV. tempora innuit, nullâ ejus in Annalibus mentione. Tum vero in bello ejus Saxonico, excidio suo, vel primo loco, inclarescere cæpit. Extruebat Henricus per omnes montes & colliculos in Saxonia Castella, & ipsi primò Saxones omni ope illum adjuvabant; Castellanis tamen deinde hostili more in vicina loca prædas agentibus, & nihil non insolentiæ committentibus, in suam perniciem, libertatisque extinctionem extructa illa esse, sero animadverterunt, suspicantes, nec forte sine causa, Imperatorem id agere, ut, deletis ad internecionem Saxonibus, Svevorum gentem, sibi carissimam, eorum loco in his terris constitueret. Cum igitur frustra Castellorum demolitionem petiissent, abeunte ex Saxonia Henrico, Principes ejus, fædere cum Thuringis facto, non de persequendo Cæsare, sed destruendis Castellis, solliciti, omnem in id operam suam converte-

runt.

runt. Quomodo singula destructa, nonnullis vim vi masculè
opponentibus, pluribus nunc enarrare superfluum fuerit.
De *Heimburgo* tantum aliquid dicam. Disertè *Lambertus*
Schafnaburgensis scribit, Castellum illud primum omnium
à Thuringis obsessum, paucos intra dies vi militari armis-
que oppugnatum & denique succensum esse. *Anony-*
mus tamen *Scriptor Belli Saxonici*, quem *Goldastus in Re-*
plicat. pro Imperio contra Gretserum edidit, quemque putat
esse Rupertum Goslariensem Præpositum, postea Baben-
bergensem Episcopum, qui rebus gestis interfuit: Is, in-
quam, aliter rem narrat, tria scilicet millia Saxonum Ca-
stellum illud *Heimenburg* (quod *Hennenberg* vitio descri-
ptoris ibi male vocatur) omni vi oppugnasse, sed à Castel-
lanis propulsa esse, magna clade accepta. Deinde Comi-
tem Palatinum Saxoniae cum sex millibus obsudione cinxis-
se castellum, certa spe, fore, ut fame ad deditionem obsessos
compelleret, sed tandem, corruptis auro Præfectis, arcis de-
ditionem impetrasse. Quicquid autem de hac variatione sit,
certum interim est, Castrum illud tum temporis à Saxoni-
bus fuisse occupatum & destructum. Cum tamen dein-
de infelici prælio ad fluvium Unstrut Saxones à Rege de-
victi & fugati essent, moxque, illo in Saxoniam regresso,
Principes se dedidissent, omnia illa Castella, prius diruta,
summo nisu, summoque Provincialium labore & ærumna
restaurari Henricus iussit, & plurima nova insuper, in
omnibus per Saxoniam montibus & collibus, qui modo
ad arcendam vim paululum commoditatis habere viderentur,
extruxit, & reliquis quoque, quæ, deditis Principibus,
in jus suum cesserant, præsidia militaria imposuit.
Inter hæc igitur *Heimburgum* quoque restauratum fuisse
ex ruinis suis, valde verosimile est, cum ob situs commo-
ditatem ad coercendos aut infestandos Halberstadenses
valde opportunum sit. Evenit tamen, ut iterum Saxoniae
B. Principes,

Principes, occasione per Geronis Comitis filios duos data, redintegrato contra Henricum bello, armata manu Saxoniā omnem peragrarent, notatque diligentissimus *Lambertus Schafnaburg.* eos, *Castella*, quibus Rex *præsidium imposuerat, alia deditioe, alia militari manu, omnia recepit.* Et ita deinde, Henrico à Pontifice Romano excommunicato, Principes in ejiciendis ubique Regiis præsiidiis continuarunt. Cumque mox prælia felicia à parte Principum intervenirent, probabile est, in manibus Principum *Castella* ea mansisse: certè dirutorum iterum nulla extat in Annalibus mentio. Deinde vero Henrico Leoni paruit. Nam in bello inter Fridericum I. Cæsarem & Henricum Leonem gesto mentio fit, illudque cum aliis Cæsari traditum ad ann. 1180. refert *Chronicon Bigaugiense*: quod idem refert *Chronicon Montis-Sereni*, in quo iterum male scriptum est *Henneberg* pro *Heimenberg*, inferendumque etiam hujus Castrinomen *Arnoldo Lubecensi lib. 2. cap. 31.* cum in MSto Coice Ranzoviano ita haberi annotet *Cl. Bangertus*. Quid ex eo tempore castello huic factum sit, non accuratè satis ab Annalists annotatum est: nisi quod superiori seculo, circa Reformationis initia, exorto per tumultantes Rusticos gravissimo bello, cædibusque & rapinis passim & in hac quoque vicinia excitatis, extremam castelli hujus desolationi manum impositam esse, avorum memoria constat. Hodie enim de antiqua Arce rudera tantum quædam ingentium murorum & fortissimarum turrium supersunt in vertice montis seu collis, non inamæni, ab aliis quasi separati. At Familiæ ab *Heimburg* nomen celebre interim mansit in vetustis illius ævi monumentis: quod ab Arce illa accepisse, nullum apud me dubium est, quamvis primus, qui nomen inde retulerit, incertus sit. Annales illorum temporum memorant, Henricum IV. per montes illos & colles in castellis Amicos suos

9
suos collocasse, ut Saxones observarent, & Principibus
Saxonum captis, abductisque, *beneficia eorum militibus suis,*
quorum præcipue opera in bello Saxonico usus fuerat, distri-
buisse, ut habent verba *Lamberti Schafnaburgensis.* Hinc igitur
à Castellis nomina sua non pauci Comites Barones-
que acceperunt. Ita *Comites de Hartzburg* passim me-
morantur, ut *Ludolphus de Hartzburg* sub Friderico I.
apud *Arnoldum Lubecensem* l. 11. c. 31. & *Hermannus Comes*
de Hartzburg apud Eundem l. 6. c. 5. & *Hermannus* &
Henricus Comites in Diplomate Ottonis apud *Maderum in*
Antiq. Brunsv. p. 131. & in litteris Philippi Regis de ann.
1186. apud *Herm. Hamelmannum in Chronic. Oldenburg.*
Henricus Comes de Hartzburg adducitur. Ita ab alio Ca-
stello *Asenberg* nomen accepit, qui in litteris Vulradi Epi-
scopi Halberstadensis ann. 1268. testis adducitur, *Burchar-*
dus ab Asenberg. Sic igitur quoque Heimburgii ab arce
illa, quam Imperatoris Henrici IV. beneficio tenuerunt,
nomen mutuati videntur, quamvis intervenientibus
temporum difficultatibus illius possessionem amiserint.
Diu tamen illos post Henricum IV. adhuc castrum illud
tenuisse certum est. Vixit Friderici II. tempore quidam
Tidericus Lange, Canonicus Goslariensis & Eimbeccensis,
scripsitque præter alia de *Laudibus Saxonie* Poëma, quod
penes me MStum est, ex illo autem editum ante triginta
annos à Parente meo Joh. Henrico Meibomio. Ille vario-
rum Comitum & Baronum, qui in Saxonia tum fuerint,
arcesque & castella tenuerint, facit mentionem, ideoque
ex eo versus aliquot integros, rudes licet & incultos, quo-
niam adeos deinde etiam provocandum, adducam, cum
rerum hujus viciniae peritus fuerit, & idoneus proinde
testis.

Barones, Comites, tenet & Saxonia dices,
Nobilitas illos ornat, magnosq; pusillos.
Everstein, Dasle. Hardenberg, addito Plesse,
Waldenberg, HEIMBORG, Wernigrod, postq; sit
Humborg

Sladen, Barbuje, post hæc Hademersleve, Hoje,
Wantsleve, Scharfælde, Blanckenborg & Querevor-
Mansvelt, Valkenstein, Warberge sive Regenstein. (de,
Lindaw, Scharwenborg, Danneberg, Schermbeke, Wun-
storp.

Hi Principantur, multis castris dominantur,
Montibus & sita servant sua castra polita.

Fortes armigeri, corpore belligeri.

Hi varias fortes armant quandoq; cohortes.

At vero, quis primus ille fuerit, & unde advenerit, cui
Henricus IV. Heimburgum in beneficium contulit, nomine
inde ad integram gentem propagato, non certo constat.
Antiqua traditio est, in bello illo Saxonico, rogatu Ar-
chiepiscopi Bremensis, qui Cæsari favebat, Annonem
quendam ex Frisia selectas copias (& nominat quidem di-
fertè Fresones inter varias gentes in exercitu Cæsaris Ano-
nymus Auctor de Bello Saxonico. à Goldasto editus p. 34.)
Cæsari adduxisse auxiliares, & hunc esse primum in his
regionibus gentis illius auctorem, quæ deinde à castro
Heimburgo nomen nata est. Hinc illa de ortu Heim-
burgiorum Frisico vetus persuasio. Vidit avus meus Hen-
ricus Meibomius apud D. Bacheim Canonicum S. Cy-
riaci Brunsvigæ Chronicon MStum Martini Poloni in
membrana, cujus fini cum alia, tum hæc verba adscripta: Illi
qui Honstein & de Henneberg dicuntur, sunt Itali, Columnen-
ses videlicet. De Lippia sunt Ursini, sicut & de Anebolt.
Schomborg, Hoje & Heimborg venerunt ex Frisia. Qui
quidem, quisquis fuerit, uti in prioribus secutus videtur
ocio-

11
ociosos illos & inepte curiosos, qui nobilium Familia-
rum Germanicarum origines ultra Alpes quærunt, (ceui in
Anhaltinis quoque facit *Ernestus Brotuffius* & in Lippien-
sibus *Bernhardus Willius in Chron. Lippiensi MSto.*) & me-
rito explodendus: ita de Scomborgensibus & Hojensibus
non male sensit, cum originem eorum Friscam esse no-
tius sit, deque prioribus id jam tum observatum ab *Her-
manno de Leerbeck in Chron. Schaumburg.* de posterioribus
vero ab *Hilberto Schone & Gerhardo Reinsbeck in Chro-
nico Bremensi MSto.* Ut ita fortassis alterum quoque illud
de *Heimburgiorum* origine Frisca verosimile esse videatur.
Fateor tamen, mihi semper illa suspecta visa esse & dubia,
cum nullo testimonio probatum sit, Annonem illum ex
Frisia venisse. Neque etiam argumentum illud, quod à
nomine *Annonis*, Genti *Heimburgicæ* dein admodum fa-
miliari, petitur, quasi idem sit cum nomine proprio, Fri-
siis usitatissimo, *Enno*, magni apud me momenti est. Cur
enim *Annonis* nomen, mutata etiam littera, ex Frisia pe-
timus, quod in tota Germania & Saxonia, cum aliàs, tum
illo ipso tempore, usitatum? Vel solus ille famosus Colo-
niensis Archiepiscopus *Anno* tempore Henrici IV. id do-
cuerit, ne de Wormatiensibus, Basileensibus, aliisque Epi-
scopis dicam. Scribitur autem modo cum, modo sine aspi-
ratione, ut alias *Hugo, Ugo, Haimo, Aimo*, & hinc Colo-
niensis Archiepiscopus à *Lamb. Schafnaburg.* ad an. 1056.
Anno, ab *Hermanno Contracto* vero *Hanno* vocatur, quam
in rem commentatur quoque *Martinus Opitius notis in
Rythmum de S. Annone Colon. Archiep. p. 4.* Suspiciatus
aliquando sum, originem *Heimburgicæ* Gentis Svevicam
esse. Jam tum enim memoravi, & ex Historicis notum
est, Henricum IV. Svevos suos in Saxoniam duxisse, iisque
arces & castella, ringentibus Saxonibus, credidisse & be-
neficia illorum ipsis contulisse. Fortassis igitur ex Svevia
B 3 cum

cum Cæsare venerint quoque primi conditores, sive dein-
de nomen hîc mutaverint, sive etiam attulerint & hic re-
tinuerint. Nam esse in Svevia castrum *Heimburg* & no-
bilem *Heimburgiorum* familiam (ex qua forte etiam *Grego-
rius Heimburgius*, Consiliarius Moguntinus, Pii II. Pontificis
nobilis adversarius, quem ipse Papa scientia juris & facundia
inter Germanos facile Principem appellat) eamque ho-
dieque ibi florere certum. Non improbabile proinde est,
ad exemplum Svevicæ illius arcis Castello quoque Hartzico
apud nos nomen id datum esse, non inusitato alias more,
ut peregrina nomina nostris locis conferrent Cæsares, jam
à Caroli M. ævo, qui Heristallo Saxonico ab Heristallo
Gallico, ejusque filius Ludovicus Pius Corbejæ nostræ à
Corbeja Gallica nomen dederunt. Jam tum tamen, qui
castellum *Heimburgum* apud nos à Cæsare accepit, *Heim-
burgium* dictum, & ex Svevis illis nobilibus oriundum fuisse,
non ausim certo asserere, cum præsertim *Heimburgiorum*
in superiori Germania Insignia cum Nostratum non
conveniant. Sed lubet illi conjecturæ meæ aliam adjun-
gere, non meam tamen, sed Cl. Viri *Job. Henrici Hof-
manni*, immaturè nuper defuncti, qui magnam Historiæ
Saxonicæ peritiam sibi acquisiverat, cum Seren^{iss} Brunsv.
& Luneb. Ducibus, Cellis primum, dein Hannoveræ ab
Archivis esset. Devenerat is in illam sententiam, eandem
esse Familiæ *Heimburgicæ* & *Hoimianæ* originem, à Rued-
gero quodam Hersveldensi, ab Haimone Episcopo Halber-
stadeni in has terras deducto, & quidem ex quadam an-
notatione Rocchi, *Monachi Ilfenburgensis, de vita Haymo-
nis Episcopi Halberstadeni*. Fragmentum ipsum, uti il-
lud ex libro grandi membraneo Ecclesiæ Hildesheimensis
descripsit, & mecum communicavit, ita se habet: *Beatus*
Vir (Haymo scilicet Episcopus) *ut operibus sanctis intentius*
in vigilare posset, omne seculi negotium à se removit, abjici-
ciens.

13
ciens illud in propinquum suum Ruodger, quem de Herosves-
feldensi Abbatia secum in Parochiam Albrestat adduxerat.
Hic commissum sibi opus industriose implevit, & propterea do-
mus sua sicut domus Obed, benedicta est à Domino, & valde
dilatans generationem suam filios filiorum ipse vidit, de quo-
rum sanguine adhuc in nostris diebus non paucos in Castro
Haimenborg gaudemus florescere. Testantur autem Chro-
nica Halberstadenſia, Winnigſtadii, Torquati, aliorumque,
Virum illum ab Haymone Episcopo ex Abbatia Hersfer-
denſi allatum, & constitutum Majorem Domus Episcopa-
lis (quæ dignitas dein perpetua facta est, & nostra demum
memoria exspiravit) condidisse locum quendam, Haim di-
ctum, liberosque numerosa serie ab ipso descendentes ab
Haim dictos, familiâ hodieque florent. Inde igitur conclu-
debat Hofmannus, cum non constet, Hoimios unquam te-
nuisse Heimbürgum, Rocchus autem illud de Ruodgeri posteris
attestetur, utrosque Heimbürgios & Hoimios ab illo Ruod-
gero Hersfeldensi, Haymonis propinquo, descendere, quo-
rum priores Heimbürgum castrum, posteriores locum
Haim tenuerint. Et hoc probabilius sibi videri afferebat,
quod tessera gentilitiæ Heimbürgiorum & Hoimiorum ferè co-
inciderent, Trabibus tam in his, quam in illis extantibus, ga-
lea tantum nonnihil differente, qualis discrepantia à vete-
rum in talibus libertate dependeat. Verum hæc, ut ut in-
geniosa, non tamen etiam sese approbare mihi possunt.
Nam, ut ut Hoimii, ex hoc Rocchi fragmento, nomen pri-
mi Auctoris familiæ suæ discere possint, cum Annales
Halberstadenſes quidem rem ipsam narrent, nomen ta-
men Rudgeri ignorent, & non errasse Rocchum, ex eo fiat
verosimile, quod Ruodgeri nomen frequentissimum sit a-
pud Hoimios, & quasi gentilitium: tamen, quomodo Heim-
bürgii inde deduci possint, non video. Non constat enim
de Roccho illo, quando vixerit, & videtur mihi valde proba-
bile,

bile, longè aliud ab illo indicari *Haimenburg*, quam castellum illud Hartzicum, quod tum nondum fortassis erat constructum, sed in pago *Haimburgum* aliquod seu castrum, à Ruodgero in Cognati sui Haimonis Episcopi memoriam constructum, quod adamnem Soleke non procul à fontibus salis fuisse, notant Annales Halberstadenfes. Illud igitur *Haimenburgum* tenuerunt Haymonis Episcopi posterius, *Hoimii* dicti, non alterum Hartzicum. Et vero, uti in *Hoimiorum* familia frequens est *Ruodgeri* nomen, ita, me conscio, nunquam id inter Heimburgios occurrit: nec de duarum harum familiarum ex uno fonte defluxu ulla extat patria traditio, quæ deesse in re tam memorabili non temere solet.

Interim, quocunque antehac nomine fuerit, invenit deinde Anno modo dictus novum à castello *Heimburg*, illudque ad posteros propagavit. Fuit autem Cæsari Henrico ob merita & fidem gratissimus, inque castris ejus fortissimus miles, illique, inter tantas in imperio turbas, & contra caput ipsum conjurationes, fidelis, vitamque produxit ad annum usque 1106, Imperatori ipsi fatalem. Ita tamen hîc deficiunt Annales, ut nec de rebus gestis, nec de conjugio liberisque ejus quicquam afferre possim. In bello Saxonico sub Henrico V. memoratur etiam *Anno ab Heimborg*. quem eundem esse ratio temporum vix admittit: fortassis igitur prioris filius fuerit, Cæsari & ipse multorum meritorum & fidei nomine imprimis carus. Exortæ tum iterum erant inter Henricum V. & Saxoniae Principes contentiones gravissimæ, hique libertatis avidi, ut sub Patre ejus Henrico IV. cæperant, inter se conspiraverant, avitam libertatem & sua armis defensuri. Cæsar vero omnes illos conjurationis participes dignitate privavit, aliosque in eorum locum substituit, & feuda, quæ ab imperio habebat, ademit. Ex his erat *Friedericus*, Comes Palati-

15
Palatinus Sommerseburgius, Senior dictus, qui primus dignitatem Palatinam, Friderico ex Palatinis Saxoniae, Wettinensis familiae, oriundo ereptam sibi vindicavit. Quem acriter persecutus Caesar, gravique custodia detentum, non nisi intercedentibus plurimis Principibus, & solutis quingentis marcis argenti, liberum dimisit, plurima vero feuda, quae ab Imperio habebat, eidem ademit, & non pauca, imprimis quae circa Schöningam, *Annoni Heimburgio* contulit, cujus etiam posterius per duo amplius secula illa tenuerunt. Annotatur autem, hunc Fridericum Comitem A. 1118. *Annonem ab Heimborg* ad duellum provocasse: nec ille recusavit, intervenientibus tamen Reinhardo Episcopo Halberstadeni, & Praeposito ejus Guncelino, res composita est. Uxorem habuit nobilem *de Bimende*, Helmodi filiam. An vero ex ea, & quos genuerit liberos, certo affirmare non possum. Cum tamen in litteris An. 1146. memorentur *Anno, Sigefridus & Henricus ab Heimborg*, fratres, hos Annonis modo dicti filios fuisse, non caret verisimilitudine. Ex quibus *Henricus*, religiosorum ordini S. Benedicti transcriptus, in Caenobio S. Johannis Baptistae ante Magdeburgum habitum sacrum induit. Et hos fratres sororem habuisse *Heilwigin* constat, quae nupsit *Wernero*, qui tamen quis fuerit, non additur. *Sigfridus* filium reliquit, etiam *Sigfridum* dictum, cujus utriusque, & patris & filii, mentio fit in litteris An. 1159. Uxores tamen eorum ignorantur.

Et haec tenus quidem, quae adduxi, ex densissimis Antiquitatis tenebris eruta, lucem in plusculis adhuc desiderant, nemine istoc aëvo ferè extante, qui Illustrium Virorum memoriam conservaret, aut genus annotaret, nisi forte in Monasteriis curiosiores nonnulli id agerent, quorum tamen diligentia intra eos potissimum, qui suo ordini adscripti, sui que cætus pars facti, aut qui liberalitate sua cæno-

C

bia

bia ditassent, terminabatur. Deinde tamen à *Sigfrido*, quem modo dixi, ad nostra usque tempora, certior, & continua, & exacta series totius illustris familiae haberi potest. Præterquam enim, quod plura Diplomata, Litteræ, & Donationum tabulæ, ab his temporibus ad nos pervenerint integra, in quibus aut *Heimburgis* feuda conferuntur, aut illi aliis ea conferunt, donantque sua bona & vendunt, aut more ævi, tanquam testes, in Tabulis solennibus adducuntur; Annales quoque & Chronicorum Conditores pluscula de illis annotant. Ex quibus non sine cura hæc compilata primum, dein digesta sunt.

Et *Sigfridus* quidem ille *Junior* in Henrici Leonis, Ducis Saxoniae & Bavariae, aula vixit, fitque ejus mentio in litteris An. 1176, ubi cum Eberhardo de Lapideo Monte (*Steinberg*) & Ecberto de Walmoden testis adducitur. Filios habuit *Henricum* & *Annonem*, ut patet ex aliis literis, datis A. 1199, ubi cum Patre *Sigfrido* testes adducuntur filii, *Henricus* & *Anno*, vocanturque milites. Videtur autem *Sigfridus* ad notabilem senii gradum pervenisse, cum per integros quadraginta annos passim in litteris memoretur: tempus tamen mortis ejus ad supradictum Annum 1199. & seculi duodecimi finem pertinere crediderim, nam paullo post in aliis litteris vocatur *pæ memorie Sigfridus*. Hi deinde duo fratres, *Henricus* & *Anno*, uxoribus ductis familiam propagarunt, liberis utriusque sexus susceptis, non pari tamen diuturnitate, nam in *Henrici* posteris ea mox extincta est. Ambo fratres adducuntur simul in litteris 1222, ubi, quæ ab Imperio habuerant, Molendinum Wechfungen, & partem agri Himmelreichsfrodensis Monasterio Walckenredensi vendiderunt, quod notat *Henric. Ecstormius in Chronic. Walckenredensi. p. 86.* *Henricus* in patria sua sede *Heimborg* vixit, & in litteris An. 1215. quibus Otto, primus Dux Brunsvicensis, proprietatem suam in Santer-

17
 Santerleben Templo Hierosolymitano confert, inter Mi-
 nisteriales Ducis, tanquam testis, adducitur, & in Ejusdem
 Ottonis litteris, datis Ecclesiae S. Blasii in Brunsvic. A. 1227.
 itidem inter testes nominatur. Uxorem habuit *Juttam de*
Gatersleben, cujus fratres nominantur *Ludgerus* & *Ber-*
tramus de Gatersleve, Equites, ex eaque genuit quinque
 liberos, tres filios, *Nicolaum*, *Lippoldum*, *Johannem*, duas-
 que filias, *Cunigundem* & *Adelheidin*: & quidem *Nicolai*
 mentio fit in litteris Volradi Episcopi Halberstadenfis An.
 1257, ubi inter Nobiles Laicos testis adducitur. *Lippoldus*
 cum fratre suo *Johanne* memoratur in litteris Ducis Otto-
 nis, Pueri dicti, A. 1236. quod scilicet *bona sua in Ossewen*
& Beierstet resignaverit in manus Ottonis Ducis, & acce-
 perint *bona in Bersle*. Omnes vero hi memorati, *Henricus*
 cum uxore sua *Jutta*, & filiis suis, *Nicolao*, & *Lippoldo*,
 & filiabus *Cunigunde*, & *Adelheide*, adducuntur in litteris
 an. 1230, ubi consensum suum dant, ut Cænobium Ridda-
 geshusianum emere possit agros quosdam in Hadeber.
 Simon. Abbas Michelsteinensis, pararius fuit, & etiam si-
 gillum suum litteris apposuit, quæ ita clauduntur. *Acta*
hæc sunt in domo nostra Heimborg, presentibus honestis vi-
ris, Dn. Annone de Heimborg, Johanne, filio ipsius, & Hen-
rico, filio Lippoldi. Ubi tamen, quis ille *Henricus, filius*
Lippoldi, sit, fateor me nescire, nisi ante dicti *Lippoldi*, qui
 filius *Henrici*, filius, & valde tunc adhuc juvenis fuerit,
 cujus tamen nulla alibi mentio. Vocatur vero ille *Lippol-*
dus Dapifer, uxoremque habuit de nobili familia de Balne-
 husen, cujus frater memoratur Echardus. *Lippoldus* quo-
 que *ab Heimborg*, qui Monasterio Hujesburgensi dimidiam
 aream in villa Borsum, & quartam partem mansi cum omni
 utilitate vendidit, cujus itidem litteræ extant datæ Nort-
 husæ Kal. Mart. 1298, & aliæ A. 1306. datæ, apud *Ecstori-*
mium Chron. Walkenred. p. 110, & aliæ A. 1313. cum Qued-
 linbur-

linburgi esset, videtur esse hujus *Lippoldi Dapiferi* filius. Cum eo autem omnis memoria posterorum *Henrici* desinit: nam nec filiae *Cunegunda* & *Adelbeidis*, an, & quibus nupserint, constat.

Ad *Annonem* igitur pergo, *Sigfridi Junioris* alterum filium, qui ad nostra usque tempora illustrem familiam propagavit. Magnum ille sibi virtute bellica paravit nomen apud plures Principes, Duces imprimis Brunsvicenses & Lynæburgenses. Mentio ejus fit in litteris Ducis Ottonis, Pueri dicti, datis in Brunsvic. A. 1232. Indict. v. in alio item privilegio illius Ducis Ottonis, dato an. 1247. Burgenfibus in Duderstad, constituitur fidejussor una cum aliis. Et illius quidem Ducis Ottonis Dapifer fuit A. 1249, mansitque post mortem ipsius apud filium & successorem, Ducem Albertum. Habuit etiam aliquando Advocatiam Salinarum Schöningsium, quam tamen A. 1256. dimisit. Uxoris ejus nomen ignoratur quidem, ex nobili tamen familia de Meinersheim (de qua multa habet Avus meus in *Chronico Riddagesbus*. p. 51.) eam fuisse, Ludhardi sororem, constat. Et ex hac suscepit tres filios, *Henricum*, *Annonem* & *Heinonem*. De *Henrico* pluribus agam, quoniam virtutem, fortitudinem, & prudentiam suam in propaganda & defendenda Christiana religione occupatam habuit, quo militiæ genere, si cætera rectè se habeant, nullum apud Christianos majoris fieri par est, nullum acceptius Deo esse credimus. Hoc scilicet tempore, non in Oriente tantum pii fortesque Viri, institutis certis Militiæ Sacrae Ordinibus, loca sancta recuperare nitebantur, sed in occidente quoque contra paganos & Idololatrias, qua voce qua ferro pugnabatur. Cum igitur Milites ordinis Teutonici, seu Hospitalis S. Mariæ Domus Teutonicorum Hierosolymitani, extota Syria cum reliquis Christianis expulsi, feliciter in Prussiam venissent, ibique à Conrado Masoviae Duce

19
Duce in Terram Culmensē vocati essent, per Ordinis sui
Duces, quos Magistros nominabant, summa cum laude &
gloria contra paganos militarunt, non terra Culmensi tan-
tum, sed tota pene Prussia subjugata. Isto vero exemplo
in vicinam Livoniam quoque, factū primum per Merca-
tores Lubecenses, in Dunæ fluvii ostium illapsos, Religio-
nis Christianæ initio, Episcopisque admissis, per illos Mili-
tes advocati, contra infideles se devoverunt, *professionis suæ*
signum in forma gladii, quo pro Deo certabant, in suis vestibus
præferentes (verba *Arnoldi Lubecensis Chron. Slavor. l. 3.*
c. 9.) dicti inde Gladiferi, item Gladio-cruciati, constituto
pariter ordinis Magistro, quorum primus *Vinno*, alter *Vol-*
quinus fuit. Excitati vero horum Ordinum fama & mi-
litæ peculiaris gloria & sanctimonia, Imperatores & Pon-
tifices amplissimis privilegiis illos ornavunt; Principes ve-
ro, Illustres, Nobilesque viri, vel adductis Ordini in auxi-
lium copiis aliquamdiu cum Sacris illis militibus milita-
runt, vel ipsi etiam in Ordinis illius membra cooptari se
fecerunt, perpetuo militæ talis voto. Et ordini quidem
Teutonicorum Militum in Prussia, cum alii Principes, ut
Henricus Marchio Misnensis, ejusque filius Theodoricus
auxilia multorum militum secum adduxerunt, tum, ex Se-
renissima quoque Ducum Nostrorum Domo, *Albertus*
Magnus An. 1265. ad eos militatum ivit, cujus *Petrus de*
Dusburg, Ordinis Theutonici sacerdos, in *Chronico Prusiæ*
ante 350 amplius annos scripto, c. 25. & c. 26. magna cum
laude Ducis meminit, *Deo devotum Principem* vocans,
& cum *multitudine copiosa peregrinorum in subsidium fratri-*
bus in gravissimo necessitatis articulo constitutis venisse, castra-
que cepisse, & *per spatium unius anni multa bella gessisse*,
& *toties vexasse Pruthenos, ut non potuerint respirare*. Et
ad hujus patris sui exemplum filius Albertus, Pinguis
dictus, cum Principibus aliquot, Alberto Landgrafio Thu-
ringiæ,

ringiæ, & Ottone Marchione de Brandenburg & Dynastis multis in Borussiam contra paganos cum signo crucis profectus est, ut notat *Monachus S. Ægidii in Compilat. Chronol. ad an. 1265.* quamvis propter hyemem lenem eo tempore nihil eum profecisse, notetur in *Additam ad Lambert. Schafnaburg. ad annum dictum.* Hujus vero Alberti Pinguis filius, *Luderus*, cum itidem ordini Sacro in Prussia militasset, Magister dein Generalis Ordinis factus est, memineruntque illius multa cum laude *Chronica Prusiaca*, & *Duxburgus* quoque, extructamque ab ipso Cathedralē Ecclesiam in urbe Regiomontana memorant, in qua etiam in muro Chori sepulcrum invenit, ut notat *Casspar Henneberg in Explicat. majoris mappæ Prusiacæ. p. 209.* Similiter in Livoniam, precibus Alberti Archiepiscopi Rigensis, & Magistri ordinis Volquini, iverunt militatum cum multis copiis Albertus Dux Saxonie, Comes Orlemundanus, Arnstetensis, alique, de quorum rebus gestis pluribus differit in principio *Chronici sui Livonici Balthasar Russow.* Ad hos etiam sacros Milites Livonicos, ut jam ad nostram historiam redeam, ivit *Henricus ab Heimborg*, virtutis & fortitudinis suæ in illa optima palæstra illustre editurus specimen. Quanta & qualia fuerint, quæ gessit, incuriosi quidem Annalistæ ignorare nos patiuntur, magna tamen fuisse, bonumque de eo Ordinis totius judicium, & magnam expectationem, inde colligere licet, quod in Magistrum Teutonici Ordinis in Livonia A. 1245, fuerit electus. Teutonici, inquam, Ordinis in Livonia. Cum enim Milites Gladiferi incursionibus Barbarorum sustinendis pares non essent, nec tutari etiam sua contra Danos, Revaliam possidentes, possent, in consortium ordinis Teutonici in Prussia recipi petierunt, id quod etiam non diu post, cum Volquinus Ordinis Magister periisset, impetrarunt, facta Ordinum conjunctione, certis tamen pactis initis, quibus Livonicis

21
nicus Magister alteri illi Prussico aliquo modo subiectus
est, accepto etiam, Pontificis jussu, Ordinis Domus Teu-
tonicæ habitu regulari, Episcopis contra Prussiæ Rigen-
sem pro Metropolitano acceptantibus. Hinc igitur Her-
manus de Salza Magister Generalis, seu summus, Ordinis
Teutonici misit Hermannum Balke, (ita enim appellat
Dusburgus, quem alii Falcke) Magistrum hætenus Pro-
vincialem Prussiæ, in Livoniam, sed ille, cum per sexen-
nium Ordini præfuisset, in Germaniam abiit. Tum sum-
mus Magister Ordinis in Prussia, *Henricum ab Heimborg*,
Magistrum Ordinis in Livonia, A. 1245. constituit. Erant
tum difficillima tempora, requirebatque Ordo talem Prin-
cipem, qui non animo tantum valeret & prudentia, sed
iis quoque corporis viribus, quæ expediendis gravis &
continui belli negotiis pares essent. At vero in *Heimbur-*
gio hoc nostro corpus erat imbecillum, & causarium, fra-
ctum sine dubio longis duro sub Martelaboribus, ideoque,
cum gravi illi muneri per biennium præfuisset, nec lauda-
ri à solis consiliis cuperet, Ordinisque fortunæ detrimen-
tum aliquod metueret, sese honore & auctoritate, quam
dilectum sibi Ordinem commodis suis privare pie pruden-
terque voluit, utque alium, affectu quidem & animo erga
Ordinem, sibi parem, viribus vero corporis valentio-
rem sufficerent, obtestatus est, & impetravit, quod in *Chronico*
suo Livonico Balthasar Russowius p. 8. notat, qui tamen
non addit, an patriam repetierit, an ibi mortuus sit, ideo-
que & ego id, deficiente alibi quoque memotia, ignorare
cogor. Numeratur *Henricus* inter Magistros Ordinis, à
nonnullis II, ab aliis IV. Secundus, quia à Balkone, qui
post unionem cum Prussico Ordine primus, alter est.
Quartus, quoniam à primis Ordinis in Livonia initiis,
post Vinnonem, Volquinum, Balkonem, quartus illi præ-
fuit. Id certum, magnam tum fuisse dignitatem horum
Magistro-

Magistrorum, quam accipere illustri loco nati non recusarent: uti etiam tandem Magister Ordinis Livonici, postquam se à Prussico, numerata pecunia, redemisset, inter Principes Imperii locum habere cepit.

Sed jam ad fratres *Henrici*, *Annonem* & *Heinonem* reverti cogor. *Anno*, Halberstadii in summo templo Canonicus fuit, & in litteris Volradi Episcopi, qui diu Ecclesiæ illi præfuit, sæpius adducitur Ann. 1257. 1258. 1266. 1293. ut ad longam senectutem ipse etiam pervenisse videri possit. *Haino*, tertius fratrum, qui in litteris Ottonis Ducis An. 1249. adducitur, solus familiam propagavit, omnium hodie viventium magnus parens: uxor tamen, quæ fuerit, & de qua familia, ignoratur: filii memorantur duo, *Anno* & *Henricus*, & una filia *Bia*. *Henricus* uxorem duxit, quamvis quæ illa fuerit, nesciam. In Cænobio S. Laurentii prope Schöningam Memoria, ut loquuntur, fuit ordinata pro *Henrico de Heimborg* & uxore, qui hic esse creditur, ibique sepultus: nam & bona circa Schöningam eum in divisione accepisse, certum est. cum frater *Anno* castellum *Heimburg* retineret, & alia bona. Vixit adhuc A. 1270., ut ex Tabulis patet, filiosque duos habuit *Annonem* & *Henricum*, in quibus tamen, sine liberis mortuis, linea illa desiit. Non possum hoc loco præterire, quod notat, solus licet, *Anonymus Auctor Chronici Ducum Brunsv.* editus à *Madero in Antiquitat. Brunsv.* Verba ejus ita habent ad A. 1288. *In die Bonifacii Martyris Hinricus & Anneko de Henborch, Hildemarus Advocatus Irkesleve, de Salderen miles, cum XII. sociis in Hilmenstidde à communi vulgo miserabiliter occiduntur.* Vidi sæpius ipsum Codicem Manuscriptum hujus Chronici (erat enim penes celeberrimum *Conringium* nostrum,) & non aliter quidem, quàm *Henborch* scriptum vidi, legendum tamen esse *Heimborch*, & loqui Autorem de *Annone* & *Henrico*, *Henrici* filiis,

23
filiis, qui hoc tempore vixerunt, & de quibus nobis nunc
sermo, nullum dubium est, cum tempus & nomina coin-
cidant, nulli vero alii nobiles *de Henborg* ullibi memo-
rentur. Tumultus vero ille in hac urbe nostra Helmesta-
dio, Annalibus quoque non incognitus, ortus est occasio-
ne litis inter fratres, Henricum Mirabilem ab una, & Al-
bertum, Wilhelmumque ab altera parte, qui ultimi obsi-
dione cinxerant urbem, à partibus scil. Henrici stantem. Et
jam factæ erant induciæ, Legatique Ducum, Alberti &
Wilhelmi urbem intraverant, quos, portis occlusis, cives
impetu factu trucidarunt, cum multis aliis nobilibus, &
ipso etiam Abbate Werthinensi, Ottone Warbergio, si non
fallit nos Catalogus Abbatum Werthinensium. Unde passim
male audierunt Helmstadienses, & ab Imperatore proscri-
pti sunt, ipso Henrico Mirabili, cujus partes sequebantur,
factum insolens & nullo colore excusandum, improbante.
Incidit tumultus in An. 1288. De *Henrico* igitur ab *Heim-
borg* vera esse crediderim, quæ narrat *Chronici Auctor*
quamvis solus, cum mortuus hoc tempore videatur, quippe
quem anno sequenti inter defunctos referri deprehendi.
Anno enim ab Heimborg. miles dictus, dum confirmat
venditionem bonorum in Wobeke, citat *Henricum* fratrem
& *Annonem* patrum, sed tanquam defunctos. Litteræ
datæ sunt in Coenobio Winhusen A. 1289. At *Annonem ab
Heimborg*, *Henrici* fratrem, periisse in tumultu illo Hel-
mestadiensi, quamvis forte illi interfuerit, falsum est, cum
diu post adhuc memoretur. Uxorem habuit *Cunigundam
Warbergicam*, Ludolphi & Hermannii, Canonici primum,
dein Præpositi Hildesheimensis, sororem. Producam in
hujus reifidem ex ipsius *Ludolphi de Werberg* litteris, Mo-
nasterio Mariæmontano ante Helmestadium datis, verba
huc facientia: *Nos, Ludolphus D. G. nobilis dictus de Wer-
berg, omnibus hoc inspecturis scriptum salutem in Domino*
D
sempiter-

sempiternam. Qua geruntur &c. quod nos Ludolphus nobilis de Werberge, ex consensu fratris nostri Dn. Hermannii, Majoris Ecclesie in Hildesheim Canonici, & sororis nostrae Cunigundis, uxoris honorabilis viri, Dn. Annonis de Heimborg, generi (id est, sororii seu affinis, more loquendi tum usitato) nostri, vendidimus Ecclesie Montis S. Mariae &c. presentem paginam sigillo, nostro scilicet, & fratris Dn. Hermannii, & quia soror nostra Cunigundis ipsa sigillo caret, honorabilis viri sui Dn. Annonis de Heimborg, generi nostri, sigillo sigillari fecimus &c. Acta sunt hæc Anno Domini 1303. in Castro Werberge. Hi duo Conjuges vixerunt adhuc An. 1306, citati in Litteris Marchionis Brandenburgici Hermannii, illo anno datis. In litteris quoque, eodem anno datis, Henrici & Baldvini de Wenden citatur Anno. imò, vixisse eum sequenti adhuc anno docent superstites tabulæ Alberti, Ducis Brunsvicensis, dicti Pinguis, qui in Castro Wulsenbutle anno memorato xii. Kal. Junii Domino Annoni, Militi de Heimborg, ejusq. veris hæredibus donat omnem proprietatem, tam in villa Höcherstorp, quam in agris &c. scribitq., hoc se facere intuitu multorum obsequiorum sibi fideliter ab illo præstitorum, ut forte in servitio Ducis illius eum fuisse, hinc colligere sit. Ex quibus omnibus patet, falsam esse Chronici illius relationem de cæde Annonis ab Heimborg; fortassis autem Autor Anonymus, qui in hac vicinia vixit, primum rumorem de cæde utriusque Heimburgii ad aures allapsum secutus est, annotavitque statim ea, quæ dein falsa deprehensa sunt, ceu nihil insolitum est, in præliis & tumultibus occisos memorari, qui tantum vulnerati, diu dein adhuc superstites. Interim hunc Annonem ab Heimborg etiam sine liberis mortuum esse constat, solo ex illa familia Annone, Hainonis filio, qui Heimburgum tenebat, cum posteris suis superstite. Ille tamen etiam, ut mox narrabo, Patriæ suæ Arcis possessione ex-

85
ne excidit, alibique sedes quæsit: Et deinde per tristia
totius Germaniæ, & turbulenta quoque Saxoniae nostræ
tempora, variasque rerum vicissitudines, Illustris familia
ad angustias redacta est, animi tamen magnitudinem for-
tunæ iniquitati opposuit, & in ipsis adversis major, ope-
ram semper dedit, ne quicquam antiquo splendori dece-
deret.

Monendum enim hic est, antequam ad posteriora
illa tempora decurram, propter nonnullos Antiquitatis
incuriosiores (cum aliàs ex omnibus iis, quæ hæcenus
adduxi, veteris ævi morum perito id jam tum sit manife-
stum) *Heimbürgios* statim à prima in hac Saxonia origine
sua, non in infima, sed primaria nobilitate locum suum
habuisse, quales quidem hodie Baronum & Nobilium Do-
minorum nomine veniunt. Inter illos enim collocari ob-
serves, quando pro testibus in solennibus Tabulis adducun-
tur; inter *Nobiles*, inquam, alio à *Militibus*, *Ministeriali-
bus*, *Famulisq;* loco, vocarique *Dominos de Heimborg*, pe-
culiari honoris titulo. Debere enim hæc ex more veteris
ævi, non nostro, dijudicari, quivis prudens facile intelli-
git. Qui hodie *Nobiles* vocantur, *Equites* alias, (*die von
der Ritterschafft*) tum temporis non *Nobiles*, (*Edle*) sed
Erbare vocabantur, *Nobilis* vero titulus dabatur Comi-
tibus, aliisque ex primaria nobilitate. Illustrabo hæc
verbis *Alberti Crantzii*, qui superioris seculi initio vixit,
sed historiæ mediæ ævi, Saxonicae imprimis, peritissimus
fuit: *Qui olim, inquit l. 3. Metropol c. 11. Ministeriales di-
cti sunt, aut Feudatarii, nunc ambiunt dici Nobiles. Sed co-
arguit illorum superbiam usus Principalium scribarum, &
omnium rectè discernentium munera graduum singulorum.
Primi enim Barones inter Nobiles deputantur, inde Liberi
Domini, postea Comites, inde Duces, quos appellat Papa
Nobiles Viros.* Adducit vero lib. 8. c. 46. etiam originem
D 2 ejus

eius moris: Sed ea appellatio ab assentatoribus ex superiori Germania ad nos descendit, modestiores tamen eam non recipiunt. Quæ ultima verba Crantzii valde verosimilia mihi fiunt, quando ea lego, quæ de origine Nobilitatis in Chronico suo Helvetico notavit Job. Stumpfius l. 4. c. 29. Quamvis enim circa medium superioris seculi historiam suam scripserit, morem tamen illum, quo soli Comites & Barones Nobiles dicti, ante trecentos annos in usu fuisse scribit. p. 291. Citius igitur, quam in inferiori Germania, ibi augeri tituli cæperunt. Nec tamen admittere possum, quod Lambecius Rer. Hamburg. l. 2. p. 194. in not. asserit, Nobilis titulum, Regum duntaxat, & Ducum, & minimum Comitum fuisse; quod enim Baronibus quoque, den Freyen Herrn / ut nos hodie ab aliquot seculis loquimur, datus fuerit, pluribus exemplis facillime ostendi potest, notatque recte Stumpfius, Comites, cum gradu majores essent Baronibus, alium titulum, Wolgeborne; & Principes illis majores, celsiorem quoque titulum, Hochgeborne & Durchleuchtige assumpsisse, ut ita penes Barones titulus Nobilis manserit, cum illi, qui post Barones, Ministeriales scilicet & Famuli, non Edele / sed Erbare vocarentur. p. 290. b. Si quis hac de re adhuc dubitaret, posset ille convinci infinitarum antiquarum tabularum subscriptionibus, in quibus testes ita collocantur, ut primo loco Sacri Ordinis homines, deinde illi, qui ex primaria sunt nobilitate, Comites, Barones, cum titulo Nobilis, denique alii ex inferiore sub nomine Militum (id est, Equitum Auratorum) Ministerialium, Famulorum. Ita in litteris Friderici, Episcopi Halberstadensis, datis A. 1211. Indict. 14. citantur primo Canonici, deinde subjunguntur: Laici vero nobiles, Comes Hojerus de Valkenstein, Wernerus de Anworde &c. Ministeriales autem Gerwardus de Alvensleben, Dapifer noster. &c. In quadam donatione Burchardi Archiepiscopi Magde-

97.

Magdeburgensis citantur testes *Nobilis Vir Comes Henricus de Blankenborg, Milites, Johannes de Nendorp, Tilo Marscalcus noster.* &c. Diploma Magni, Ducis Brunsvicensis, datum An. 1357, ita clauditur: *Testes huius rei sunt Gevehardus & Burchardus de Werberge, nobiles: Lippoldus & Vreden, & Baldewinus de Dalem, milites: Henricus de Veltheim & Burchardus de Assenburg, famuli.* Et hæc quidem liquida sunt iis, qui vel mediocrem aliquem gustum habent Historiæ Germanicæ & Saxonicæ nostræ. Jam autem de *Heimburgiis* clarum est, eos stylo superiorum seculorum inter *Nobiles* collocatos, ideoque ex primaria nobilitate fuisse. Adduxi supra versus nonnullos *Tiderici Langen*, Canonici Goslariensis & Eimbeccensis, qui seculo XIII. Friderici II. temporibus vixit, in quibus *Heimburgii* diserte *Comites* inter & *Barones* Saxoniae, quosque *nobilitas ornet*, collocantur. Possum vero id etiam ex Tabulis superstitibus ejus ævi probare, in quibus testes advocantur, justo inter *Nobiles* loco. Ex litteris Volradi Episcopi Halberstadenensis, An. 1257. Pontificat. 2. datis, pluscula huc facientia in rei fidem adducam: *Testes Hermannus Præpositus, Wiggerus Decanus, Burchardus Vicedominus, Volradus de Kerkberg, Rudolphus Portenarius, Everwinus Præpositus S. Bonifacii, Hermannus Scholasticus, Henricus de Regenstein, Henricus de Drondörp, Bartoldus de Clettenberg, Ludgerus Strutz, Anno de Heimborg, Ludolfus de Dalem, Hermannus Hude.* Laici vero, *Fridericus de Kerckberg, Volradus de Kranichfeld, frater noster, Wernerus de Scherembeke, Eberhardus de Sufelitz, Nicolaus de Heimborg, nobiles. Ministeriales vero Henricus de Hordorp, Jacobus de Sivershusen, Casarus de Sarckstede &c.* In litteris Henrici & Baldewini de Wenden, datis An. 1306. in vigilia Apostolorum Simonis & Judæ, citatur *Anno, vir nobilis, dictus de Heimborg, miles.* Et idem Anno in

aliis litteris A. 1290. vocatur *Dominus de Heimborg*. Cumque præterea toties *Heimburgii* cum aliis ex primaria nobilitate per conjugia sese miscuerint, inde quoque, eos non ex infima fuisse, probabiliter colligere licet. Sed redeundum est in viam.

Seculo vero decimo quarto Illustris illa familia non tantum Heimburgo arce pulsa est, sed etiam vicinia nostra abiit, feudaque eorum partim ad alios translata, partim ea, quæ circa Schönningam in Hotisleben & Hoierstorp habuerant, Baronibus Warbergicis, cognatis, vendita ab iis sunt, uti superstites litteræ testantur. Quo minus tamen omnia plenè narrare, & qua occasione id contigerit, possimus, defectus monumentorum facit, cogimurque hic quædam traditionibus credere. Id constat ex historia illius temporis, post Fridericum II. Cæsarem, privatam capite suo Germaniam, toto illo interregni, ad Rudolphum usque I. spatio, miris turbis fuisse agitatam, neminemque ab incurisibus potentioris immunem, non vicinum à vicino tutum fuisse, sed omnia, citra leges, & superioris Magistratus auctoritatem, per tumultus & bellicam vim decisa. Qui igitur, jure licet optimo & hæreditario, arces, castra, & terras possidebant, si non propriis viribus, aut vicinorum fæderibus, frequentissimis tum temporis, tuti essent, inopinato pellebantur ab aliis, & exuebantur omnibus bonis, ne colore quidem aliquo recti quæsito. Sic igitur *Annonem Dominum in Heimborg* avita quoque sede pulsum esse, illa ipsa fatali seculi calamitate, verosimile est, quamvis nescio quam monomachiam cum Comite aliquo Reinsteinio, in qua *Anno* victor, occiso adversario, evaserit, antiqua traditio ingerat, orta hinc exilii occasione. Id certum est, *Annonem* confugisse ad Ducem Lyneburgensem, Cellis sedem suam habentem, simulque ad *Dominos de Meiner sheim*, ex quorum Nobili familia Avia ejus
proгна-

29
prognata erat, concessisse, ibique tandem, spe de antiqua
fede repetenda præcisa, domicilium quæsiuissse, ducta uxo-
re. Erat illa *Henrici de Hofingen* vel *Oefingen*, militis, fi-
lia unica, & multorum prædiorum isto in Ducatu Lyne-
burgico hæres, cujus avus *Henricus ab Oefingen*, miles,
Henrico Palatino, Saxoniae Duci, Henrici Leonis Filio, à
consiliis fuit, adduciturque in litteris An. 1222. Soror ta-
men *Annonis ab Heimburg, Bia*, sive *Bina*, quam secundis
nuptiis duxit Henricus Comes Reinsteinius, cum marito
suo *Heimburgum* possedit. De *Bia* illa multa annotavit do-
ctissimus *Budæus in vita Alberti II.* Episcopi Halbersta-
densis & Ducis Brunsvicensis, quamvis nesciat, ex qua fa-
milia illa oriunda fuerit. Imprimis notat, eam, cum
duos filios Henrico Comiti peperisset, & duos quoque filias
Lucharden & Odam, A. 1289. Cœnobium Monialium S.
Nicolai in Halberstad fundasse, & post mortem mariti cum
filiabus suis id intrasse, inque eo vitæ suæ finem & se-
pulcrum tandem invenisse.

Verum, missa Comitissa *Bia*, & *Arce Heimburgo*, quæ
varium dein fatum habuit, ad *Annonem* in Ducatum Ly-
neburgicum revertendum est, qui Cellis plerumque vixit,
mortuusque est A. 1283. Turbat autem me hîc non parum,
quod *Henricus Ecstornius Chronic. Walkenred. p. 120.* me-
minit litterarum, in quibus *Anno ab Heimborg* pro se &
filiis, *Ludolpho, Hansio & Annone*, fatetur, se *mansum*
unum in Brockschoven, quem tenuerat in feudum à Comiti-
bus *Falkensteiniis*, convertisse in religiosos *Walkenredenses*
A. 1306. Quis enim ille *Anno* sit, qui filios istis nomi-
nibus habuerit, An. 1306. fateor me nescire. *Anno* enim,
de quo modo egi, quique Arcem *Heimburgum* deferere
coactus est, jam mortuus erat illo tumpore. Et habuit
quidem ille plures filios, sed aliis nominibus. Fit eorum
passim mentio in Tabulis antiquis, quarum unam inte-
gram

gram producam, ceu eam ex chartophylacio Monasterii Marienthalensis Avus meus Henricus Meibomius eruit, cum inde familiae Heimburgicae non parum luminis affulgeat, & quomodo illi, qui tum vixerunt, inter se cognati, pateat. Henricus, Hervicus, Conradus, Anno, filii Domini Annonis de Heimborg uni-versis praesentes litteras inspecturis in perpetuum. Commendari solent litteris contractus legitime celebrati, quatenus, si defecerit hominum memoria, fidelis scriptura testimonium perhibeat veritati. Notum igitur sit tam praesentibus, quam futuris, quod nos possidentes cum Annone, filio Dn. Henrici, Patru nostri, proprietatem trium mansorum, & quatuor arearum in magna Hamersleve, & proprietatem trium mansorum & trium arearum in Wegersleve de communi consensu vendidimus (Monasterio Marienthalensi sub Abbate ejus Eberhardo) pro novem talentis Brunsvicensium Denariorum liberam ab omni advocatia & onere servitiorum, liberè & cum omni jure, sicut eam Parentes nostri possederunt, & nos possedimus perpetuo possidendam. Quorum mansorum Dn. Gerhardus de Berwinckel quatuor, & Florinus de Watekessen & fratres sui cum areis eorundem habuerunt titulo phoedali. Approbamus enim sic & ratam habemus venditionem Patris nostri in praedictis duobus mansis Florini & fratrum ejus, quam fecit cum Monachis dicti monasterii, à quibus etiam sustulit quatuor talenta Denariorum Brunsvicensium pro eisdem, quod fatemur litteras per praesentes. Testes hujus facti sunt Wernerus de Schulenburg, Theod. de Monte, Wernerus de Wedinge, Bertholdus de Rede, Milites. Theodorus de Eschede, Advocatus in Twifellinge, Ludolphus de Werle, capellanus ibidem, Henricus de Esbeke, Heideco de Jerxem, Wedechindus de Dobbenem, Walterus de Nette & plures alii fide digni. Ut autem hoc factum in suo vigore permaneat, nunc & semper, nostro & Dn. Johannis, Militis de Eschede, sigillis ipsam fecimus communiri.

Datum

31

Datum Zellis in octava Epiphaniae. A. m c c x c i i. Sigillo
autem Johannis de Eschede hæ litteræ fuerunt communi-
tæ, quia ille horum quatuor fratrum tutor, datus ipsis ab
Ottone, Comite de Wolpa, à quo pleraque bona Oesingia-
na, de quibus supra dixi, feudali nexu tenebant. Ex his vero
fratribus *Henricus, Hartwicus & Conradus* deinde vix semel
memorantur amplius, sive juvenes mortui, sive in illa tem-
porum caligine ignota veluti sub nube sepulti. *Anno-*
nis mentionem sæpius fieri invenio, qui testis nominatur in
tabulis Alberti Ducis Brunsvic. datis Wolfenbüttle. A. D.
1309. feria V. post Nativit. B. Mariæ Virginis & bona sua
circa Schöningam, hæreditate ad se à cognatis devoluta,
Hotislevæ, Wobecæ & alibi, quæ in feudo tenebat ab Al-
berto Duce Brunsvic. An. 1310. vendidit. Alibi vero in
Ducatu Calenbergico ante Diesterum alia sibi bona compa-
ravit. Uxorem habuit *Mathildam* ex familia de *Honlage*,
quæ inter equestres hujus Ducatus non postrema, superioris
seculi initio demum desiit, exposita pluribus ab *Arvo meo in*
Chronic. Riddageshus. p. 95. cum qua adhuc A. 1321. vixit.
Albertus Dux Brunsvic. nominat eum in litteris An. 1318.
Strenuum militem, & fidelem suum, fitque ejus mentio adhuc
in litteris An. 1333. Ex hoc autem *Annonis* cum *Matbilda*
Honlagia conjugio nati sunt *Martinus & Anno.* *Martini*
mentio fit in litteris An. 1347. *Annonis* vero, Militis, in aliis
An. 1346. & 1352. Mortuus est An. 1355. aut paullo ante,
nam illo anno vocatur *piæ memoriæ.* Uxorem habuit ex
nobili familia de *Campen*, cumque illa quatuor filios, *Jo-*
bannem, Heinonem, Annonem, Hartwicum, & Martinum,
quorum omnium mentio fit in litteris An. 1362. 1368. 1372.
Vixerunt Adensbecci in Ducatu Lynæburgico, sed inde fede
translata, bonis prioribus divenditis, alia ante Diesterum
sibi comparaverunt. *Johannes* Canonicus fuit Minden-
sis, & Archidiaconus Remensis, ejusque meminerunt litteræ

E

A. 1381.

A. 1381. *Heinonis* quoque, *Hartwici* & *Martini* mentio fit in litteris A. 1381. *Annoni* cum Senatu populoque Magdeburgensi graves fuerunt inimicitiae, ideoque, cum in Nundinis solemnibus Urbem intrasset, conscio Archiepiscopo, excitato tamen à plebe tumulto, inspectante licet & nolente Archiepiscopo, custodiæ à Senatu traditus est, nec ex eo tempore ulla ipsius mentio fit. *Martinus* vero ex his fratribus propagavit familiam. Et primo quidem ex Coniuge, nescio qua, duos filios habuit, *Volmarum*, Canonicum Mindensem, & *Annonem*, cuius mentio fit, A. 1398. & 1404. Superstes autem his filiis suis omnibus fuit *Martinus*, ideoque jam septuagenarius licet, ne improlis decederet, uxorem duxit *Gesam*, de gente *Stederiorum*, ex eaque unum filium suscepit, brevique, post illum in lucem editum, mortuus est. Filius ille, & hæres unicus, quod mortuo patre sex septimanarum infans esset, nomen inde nactus est, & *Martinus*, cognomento *Puer*, dictus, in ipsa senectute ita appellatus fuit. Pervenit autem vivendo usq; ad A. 1482, ætatis suæ 74. & ex uxore sua *Ilfa Ruschenpolia* quatuor filias & quatuor filios suscepit, ex quibus *Martino*, *Henrico* & *Aschwino* *Henricus Senior* & *Ericus*, Duces Brunsvicensis, fratres, Decimam in *Lune*, *Aream* in *Wunstorp*, & fundos in *Benniesen* contulerunt.

In Hoc autem *Martino* desino, Excellentissime Domine. Quæ enim deinde in Gente Vestra acta sunt, quamque multis togasagoque claris Viris floruerit, non necesse est, ut ex antiquis litteris tabulisque & semesis Chronicis eruatur, cum omnia, partim accuratè annotata in scriniis Vestris serventur, partim viventium adhuc memoria & publica fama consent. *Martinus* ille *Henricum*, hic *Heinonem*, ille *Martinum* iterum, hic *Justum Heinonem*, Tuum, Perillustris Domine Præses, & Senioris fratris Tui *Martini* Patrem produxit. Nunquam vero non deinde Illustris familia

33

milia Vestra, aut vividæ indolis & fortissimos milites, aut
 prudentiæ & sapientiæ capacissimos animos produxit, qui
 Principibus & terrarum Dominis ob virtutem, fidem, & in-
 dustriam grati, magno apud ipsos in pretio essent. Equidem
Heimburgica Familia bello & armis primam gloriam, & no-
 bilitatis suæ originem, debet, non minus ac aliæ omnes il-
 lustres nobilesq; veteres familiæ, istis scilicet seculis, quo lit-
 terarum secreta nobiles ignobilesque pariter ignorabant,
 omnium bonarum artium, præter militares, incuriosi:
 postquam tamen Dei benignitas sequentibus seculis alium
 habitum, alios mores, induxit, nec consilio minus, quam
 armis res geri cæperunt, Nobiles quoque familiæ, littera-
 rum & sapientiæ optima studia, necessariumque ingenii
 cultum amare & inter suos promovere cæperunt, *Heim-*
*burgicæ*q; tum gentis juvenes virique in hoc multis aliis
 præluxerunt & exempla imitanda reliquerunt. Quorum
 nobis aliquot, non armorum tantum gloria claros, sed eru-
 ditione quoque insignes, & variarum linguarum peritis-
 simos, disertissimo calamo exposuit, insigne quondam hu-
 jus Academiæ ornamentum, *Johannes Caselius*, in ea ora-
 tione funebri, quam *Wilhelmo ab Heimburg*, Patruo Vestro,
 in hoc Lyceo studiis, immortali cum laude nominis sui,
 operam præclarè danti, sed maximo cum luctu omnium
 denato, & seculi hujus anno primo hic sepulto, scripsit.
 Scilicet Bella, & Aulæ veræ palestræ sunt, in quibus ingen-
 tium animorum, explorari vires & constantia possunt: nec
 dicam nunc, quantum in bellis quoque à studiis optimis,
 & Mathematicis imprimis Artibus, subsidii haberi possit,
 cum & veteri ævo bellicosissimæ nationes, & hodie Gallica,
 illius rei præstantia documenta exhibeant: ad Aulam ta-
 men & majora Principum ministeria neminem esse aptum,
 nisi qui mature optimis studiis excultum animum, lingua-
 rumque & variarum rerum scientia decoratum sapientiæ

deinde civilis præceptis imbuerit, notissimum esse arbitror. His igitur nominibus, semper aut in bello primi, aut in Aulis honoratiori loco esse cupientes, litteras, doctrinam & recta studia coluerunt *Heimburgii*, maximaque inde adjumenta suis rebus gerendis habuerunt, magno ipsi in pretio apud eruditos, imò pretium eruditis. Multi etiam eorum amplissimis Sacerdotiis in Cathedralibus summis Ecclesiis macti, mundi quidem à negotiis aliquantum, non à patriæ tamen amore & commodis, ipsi à consiliis magnorum Episcoporum, sese separarunt, Ecclesiæ, pauperumque patroni liberales, studiorumque optimorum hortatores, adjutores, promotoresque, id quod supra in *Aeschwino* & *Theodorico* ostendi, quos iterum vel favoris, quem Avomeo exhibuerunt, causa nomino, non instituto tantum vitæ, dignitate, & virtute pares, sed litterarum quoque & studiorum amore similes sibi. Neque vero illud in Gente Vestra *Heimburgicâ*, laude utique dignum, prætereundum est, quod sequioris quoque sexus curam habuerunt, & non nisi nobilissimis, illustribus & illustrissimis familiis per matrimonia sese junxerunt, & uti filias suas non nisi probatissimis à virtute elocarunt, ita ad sua connubia non nisi generosum sanguinem admiserunt, ut ex supra allatis patescit.

Possẽm hæc omnia pluribus explicare, & mererentur juvenibus gentis Vestræ ad exemplum inculcari, si ad alium, quàm ad Te, Excellentissime Præses, Epistola hæc directa esset: coram Te vero parcius id agere, imò tacere decentius est, cum omnibus, qui à me producti sunt, utut splendidissimis, virtute & meritis Tuis caliginem induxeris. Multum à Majoribus Tuis accepisti luminis, nec parum est, natum esse genere, quod ante sex integra secula, raro in his regionibus exemplo, in primaria nobilitate fuit, quodque in corruptum decus suum inter maximas temporum vicissitudines servavit, & ad posteros transmisit.

Longè


35
Longè tamen majus est, omnium rectè sentientium judi-
cio, quod operum magnitudine & rerum maximarum
usu omnibus majoribus tuis aut par aut major, novam
lucem toti familiæ fænerasti, eamque virtutum exemplis
semper fætam, novis, iisque eminentissimis, quotidie con-
decoras. De Te igitur potius sermomihi instituendus foret,
Tuarumque illustrium actionum merita viventibus in ad-
mirationem, posteris in exemplum essent exponenda: Et
facerem, nisi mores tuos nossem. liberos, nudos, & rectos,
& vix nostri seculi, animumque illum, adscititia simulatio-
num adulationumque respuentem, & in recti conscientia
bonorumque tacito applausu actionum suarum pretium sta-
tuentem. Quicunque tamen per hos viginti & amplius an-
nos in his & vicinis terris vixerunt, illi mecum norunt
quam difficilia tempora fuerint, quanti momenti nego-
tia in Serenæ Domus Ducum Brunsvic. & Lynæb. curiis
agitata, inter continua penè Regum Principumque bella,
rebus nostris adnexa vel implicita, inter armorum lubri-
ca, fæderum incerta, hostium, amicorum, sociorumque
vicissitudines, ipsa etiam in pace pericula. Iidem vero
ignorare etiam non possunt, quanta, in illis angustiis, ala-
critatis, dexteritatis, prudentiæ, & fidei experimenta de-
deris, quotiesque Tuo ore ad Reges Principesque, non
Domus tantum Serenissimæ utilitas, sed totius Saxonix
libertas locuta fuerit. Cum in mari omnia tranquilla
sunt, & venti posuerunt, quilibet etiam nauclerus regere
navem, & nullo negotio deducere in portum potest: at,
cum omnia sursum deorsumque vertuntur, nec minus à
fluctibus infra, quam à cælo ventisque desuper periculum
est, tum demum expertus Palinurus, multum terris jacta-
tus & alto, requiritur optaturque. Par Reipublicæ cujus-
libet fatum est. Quando in remotis vicinisque locis
turbatur, & jam grandinosa nubes calamitatem certam

in ductura Reipubl. adscendere supra verticem nostrum videtur, quando hostes timentur, socii suspecti sunt, insidiæ metuuntur undecunque, tum demum singulares illæ dotes & virtutes, quales tuæ sunt, Excellētissime Domine, requiruntur, Ingenium scilicet promptum & in numero semper, iudicium acre, prudentia usu subacta, industria incomparabilis. Si his sese jungant, uti in Te se jungunt, candor, & fides integra, & devotus patriæ animus, & incorrupta mens, quid optare magis in primario Ministro Princeps, quid desiderare patria possit, non intelligo. Gratulor Serenissimis Principibus nostris, gratulor Patriæ toti, quod in hæc tempora inciderit virtus Tua, quando illa maximo usui fuit, & esse potest: DEVMque Veneror, ut Te diutissime servet incolumem, & illa in formandis consiliis pro patriæ salute non die, non nocte, intermissa contentio, nihil roboris corpori animoque subducatur, sed novum semper vigorem addat. Idem benignus DEVS faxit, ut, dum Tu præclarissimæ virtutum exemplis familiam fecundas, alii feliciter illam propagent, ut semper in ea reperiantur, qui virtute non minus, quam genere emineant, & ita hæreditaria semper quoque sit virtutis & eruditionis in una domo laus. Quod quidem suo loco curabit frater Dn. Martinus ab Heimborg, virtute, & animi altitudine, & singulari in patriam, cuius curæ & consiliis admotus, pietate, nulli secundus, dum in Golterano suo, patriæ sede, feliciter natos filios in spem Reipublicæ, gloriæque generis, ad virtutem, animique decentem per recta studia culturam educat, ex quibus cum duos ex familiari aliquot annorum convictu Justum Heinonem & Adolphum Ludovicum noverim, illorumque alacritatem, & promptitudinem ingenii, & amorem erga studia deprehenderim, de reliquis paria mihi promittere audeo. Sed finio, Perillustri Domine, &, ut hanc Epistolam, quæ sortassis tanta jucunditate ab aliis quoque legetur, quanto labore & cura ex laceris, semelisque, & non temere obviis monumentis congesta est, Tu imprimis, Tuæque illustri familia benevole accipere, & me meaque studia commendata semper habere velitis, obnixè rogo. Dabam Helmestadii. in Acad. Julia. Kalend. Januarii. A. MDCC LXXXIII. quem felicissimum apprecor.

Pars Familiae HEIMBURGIORUM, quorum in hac
Epistola mentio fit.

Anno
tempore Henrici IV.

Anno
sub Henrico V.



5664572